

Հայաստանի չահերն էլ հաշւի առնեն, բայց տւեց և շատ ծանր հետեւանքներ, որոնց մէջ, առաջին շարքում, անկասկած, այն չափազանց աննպաստ անդրադարձումն էր, որ ունեցաւ արտաքին աշխարհում. երկու նորաստեղծ պետութիւնների պատերազմը, իրենց ինքնուրոյն կեանքի արշալոյսին, չէր կարող նկատուել բարենիշ նրանց համար:

*

Զինադադարի յաջորդ օրն իսկ, հայկական հաշտարար պատւիրակութիւնը Ղարաքիլիսայից հասաւ Թիֆլիս, և մի շարք նախապատրաստական աշխատանքներից յետոյ, յունւարի կէսերին, բացւեց հայ-վրացական խորհրդաժողովը, որը զբաղւեց ո՛չ միայն պատերազմի հաշտարարով, այլ և երկու երկրների փոխյարաբերութիւններին վերաբերող բոլոր կարևոր խնդիրներով: Հայերի կողմից խորհրդաժողովին մասնակցում էր Ղարաքիլիսա ուղարկած պատւիրակութեան ամբողջ կազմը՝ լրացած զինուորական մասնազէտ զօր. Ղորլանեանով: Վրացիների պատւիրակութեան անդամներն էին Ե. Գեղեչկորին, Ն. Ռամիշվիլին, Սաքախտարաշվիլին և զօր. Գեղեւանովը:

Օրակարգի հարցերն էին. 1) փոխադարձ անկախութեան ճանաչումն ու դիւանագիտական յարաբերութիւնների վերականգնումը. 2) հաղորդակցութեան և երթևեկութեան պայմանների կարգաւորումը. 3) թրանզիտ. 4) փոստ-հեռագրական համաձայնութիւն. 5) հայկական կորպուսի գրաւած գոյքերի վերադարձը. 6) հայկական կառավարութեան պատկանող և վրացիներից գրաւած 13 միլիոն ռուբլի գումարը վերադարձնելու խնդիր:

Խորհրդաժողովը տւեց շատ երկար, մօտ 3 ամիս: Վրացիները ակնյայտի կերպով աշխատում էին ձգձգել՝ քաջ դիտակցելով, որ ինչքան ժամանակ անցնի, այնքան դրութիւնը Հայաստանում կը ծանրանայ, հետեւաբար, և այնքան հայ պատգամաւորները կը լինեն զիջող: Վէճի գլխաւոր նիւթը սահմանների հարցն էր, որի վերաբերմամբ կողմերը մինչև վերջ էլ համաձայնութեան չեկան:

Տեսնելով վրացիների դիտումնաւոր ձգձգումը՝ Հայաստանի կառավարութիւնը փետր. 10-ին հրահանգեց իր պատւիրակութեան՝ մինչև մարտ վերջացնել բանակցութիւնները և մեկնել Երևան: Մի պահ դադարից յետոյ, խորհրդաժողովը վերսկսեց փետր. 28-ին և այնուհետև աշխատանքները ընթացան աւելի արագ: Ընդունւեց փոխադարձ անկախութիւնների ճանաչման և դիւանագիտական յարաբերութիւնների վերականգման դաշինքը: Մշակւեց Լոռիի չէզոք գօտու վարչութեան առանձին կանոնադիր: Մարտ 1-ին ստորագրւեց և ուժի մէջ մտաւ փոստ-հեռագրական համաձայնութիւնը: Մարտ 4-ին վերականգնւեց երկաթուղային հաղորդակցութիւնը. վերացւեցին ճամբորդական արտօնագրերը Հայաստանի ու Վրաստանի միջև, բացի զաղթականներից: Մարտի սկզբին բացւեց Թիֆլիսի հայկական դիւանագիտական ներկայացուցչութիւնը՝ Մ. Թումանեանի պաշտօնակատարութեամբ.